


৩ শ' আ'লীগ কর্মী সমর্থক ৫ বছর পর এলাকায়

সেনা, পুলিশ ও প্রশাসনের সহযোগিতা

 মুন্সীগঞ্জ প্রতিনিধি

বিএনপি-জামায়াত জোট সরকারের ক্যাডারদের জুলুম-নির্যাতনে এলাকা ছাড়া মুন্সীগঞ্জের আওয়ামী লীগ নেতাকর্মীরা ঘরে ফিরতে শুরু করেছেন। চারদলীয় জোট সরকার গঠনের পর মুন্সীগঞ্জের চরাঞ্চলের রক্তাক্ত জনপদ হিসেবে পরিচিত চরকেওয়ার ইউনিয়নসহ এ অঞ্চলের ৪টি ইউনিয়নের চরাঞ্চলবাসী আওয়ামী লীগ নেতাকর্মী ও সমর্থকরা এলাকা থেকে বিতাড়িত হয়েছিলেন। দীর্ঘ সোয়া ৫ বছর পর আবার তারা এলাকায় ফিরতে শুরু করেছেন সেনাবাহিনী, পুলিশ আর প্রশাসনের সহযোগিতায়।

গতকাল দুপুরে সেনাবাহিনী পুলিশ ও মুন্সীগঞ্জের ডিসি, সদর উপজেলা নির্বাহী কর্মকর্তার উপস্থিতিতে মুন্সীগঞ্জের চরাঞ্চলের চরকেওয়ার ইউনিয়নের উত্তর চরমুন্সরা গ্রামের সাড়ে ৩ শতাধিক আওয়ামী লীগ নেতাকর্মী এবং সমর্থকরা বাড়ি ফিরেছেন। সোয়া ৫ বছর পর মুন্সীগঞ্জ সদর থানা আওয়ামী লীগ সভাপতি আফছার উদ্দিন ভূঁইয়ার নেতৃত্বে বাড়ি ফিরলেন এসব নেতাকর্মী। এর আগে সকাল থেকেই গ্রামের অদূরে মুন্সীরহাটে জড়ো হন তারা। দুপুর ১২টার দিকে সেনাসদস্য, পুলিশ আর প্রশাসনের কর্তা-ব্যক্তির আসেন এখানে। বিতাড়িতদের লাইনে দাঁড়িয়ে পরিচয় নেওয়া হয়। পরে আওয়ামী লীগ নেতাকর্মীদের সুষ্ঠু পরিবেশ বজায় রাখার অনুরোধ জানিয়ে বক্তৃতা করেন ডিসি মোঃ মনির উদ্দিন, উপজেলা নির্বাহী কর্মকর্তা ওয়াহিদুজ্জামান ও এসপি জাহাঙ্গীর হোসেন মাতুব্বর। এছাড়া সেনাবাহিনীর ক্যাপ্টেন মাসুদও উপস্থিত ছিলেন। বেলা ১টার দিকে চরাঞ্চলের কৃষক পরিবারের এসব লোকজনকে এলাকায় প্রবেশ করানো হয়। এদিকে এর আগেই এসব পরিবারের মহিলা ও শিশুরা বাড়িতে গিয়ে অবস্থান নেয়। পরিবারের পুরুষ সদস্যদের সঙ্গে মহিলা ও শিশুরাও দীর্ঘদিন বিতাড়িত থেকে মানবেতর জীবন কাটিয়েছেন।